

【伯公下】邱一帆原作

記得正上小學時節，在伯公下搞到斷烏¹無半夜，無想著莊項伯公祠個大門嗰分人鎖起來，共伴個一隻一隻像猴仔樣，攀過圍牆出去，單單伸偈一儕在伯公下大門肚。心煩腦急之下，乜想蹶上門鎖，攀過大門轉屋下去，一無注意，大門頂高像箭樣個細鐵精，好死毋死就撞爛衫褲刺入吾个左手腋下，阿姆哀哀過正得，黏邊血流血著，痛到耐毋得！好得大人看著遽遽同偈扞下來，送去分先生止血、消毒、包藥仔。記得該日暗晡當恬靜，無分大人罵，乜無食著大人專門為做毋著事个細人仔準備个「竹筏板」。這下，每擺看著左手腋下个一點疤，就想起小南埔伯公下个故事。

還記得伯公下圍牆脣頂，有一頭牛眼樹，到乜避暑就會打一杷²一把个牛眼，探入伯公下這片來。該係在伯公下搞𡇗个細人仔最好个零嗒，較高个人伸手就摘得著，較矮个人就愛練會爬牆蹶樹伶俐个功夫，無斯，正經會搶毋著來食！食伸个牛眼核，毋會打爽，搞伴仔³會拿來做傾掙搞，講也奇怪，仰會搞到有意有思！

¹ 斷烏：音 ton'vu'；天黑。

² 一把：音 id'pa'；一把或一串，果實連枝葉成串的稱呼。

³ 搞伴仔：音 gau'pan'e'；玩伴。

伯公个後背有一頭香花，厥个名仔聽講安到——夜來香，到乜開花个時節，斷烏開始就會散放醃醃个香氣。伯公下貪搞个細人仔，總會帶等香味轉屋下，該時節，歸莊仔个人當像就鼻得著該夜來香味。

伯公下，係偈做細人仔時節搞𡇗个所在。逐日放學，小南埔莊項个細人仔打紙擲仔、射樹乳仔、搞傾掙⁴，大體仔就會行到伯公下。麼人較會搞、麼人較戇當⁵、麼人較奸宰？在搞个過程全全展現出來，搞伴仔目金金，伯公乜看現現。偈輒常恁想，係講童年係一齣比賽輸贏个戲，莊項个伯公下，就係盡打眼个舞臺。舞臺項無刀光劍影，淨有紙擲仔、樹乳仔、傾掙還有搞伴仔；舞臺項無血流血著个場面，但係有緊張、刺激个心情；舞臺項無刻情个評審，淨有笑微微仔个伯公，永久，深深刻在童年个畫面裡肚。

伯公下係偈童年重要个舞臺，所有在舞臺項演出過个人，偈還記得：共綱个搞伴仔，隔壁武頓个阿戊伯公當虔誠奉祀清瘦个伯公，慈祥个阿戊伯婆晒鹹菜个身影，輒常食酒醉講心事个阿富伯……，全全還留在吾个印象裡肚。年紀緊來緊大，恁著伯公下，就恁起童年時節；恁起莊項，恁起自家个莊項人。這下，小南埔莊項个伯公下既經無圍牆、無大門，乜無細人仔在該停跔搞𡇗。毋過，還做得看著莊項人帶等自家个子女，過年過節在該敬伯公。

⁴ 傾掙：音 kin'kang'；玻璃珠、彈珠。

⁵ 戇當：音 ngong dong；傻憨。

【細叔婆】李雪菱原作

還當細个時節歇在伙房項，記得伙房肚有當多人。大阿伯歇在上片，偌兜歇中央，細叔歇下片。就恁樣，偌兜細人仔每日就上片下片走上走下。

頭擺中央伙房歇大叔公同細叔公過偌兜共三房，細人仔盡多，叔伯兄弟愛掌牛，老弟不時跔佢兜去掌牛、釣蛎仔、覓蜆仔、拈田螺，無一項毋會，阿爸毋分佢跔，驚走去泗水仔，無大人在脣口當危險，係講忒暗轉來，分阿爸捉著，該就壞蹄咧，會嘍皮帶仔¹唷！

偌兜細妹人還細細仔，就愛自家暖水²洗身、洗衫褲、團草結、煮飯、炙茶……，麼个都會。吾爸食頭路，屋下當早就無蒔禾仔，毋過，種盡多弓蕉，大出个時節，偌兜愛搦手，孩毋起就用扛个。

共房頭个細叔公當早就無忒哩，毋識看過，細叔婆生來細粒細粒，當會著藍衫，有烏色个、藍色个，著起來當好看。佢盡會在禾埕尾梳頭那毛，看起來當長當長个頭那毛，梳一轉兩轉，盤

上去用紅索仔緝起來，再迂幾轉變做一粒饅頭，有時節會紮兩把盡靚个髻髻仔。偌兜幾個細阿妹仔當好坐在簷頭下看佢梳頭，看到昏昏哦！心肚恹：下二擺大也愛像佢恁樣，著靚靚个藍衫同梳靚靚个髻髻。

係講屋下个大人去田坵做事个時節，細人仔同細叔婆共下留在屋下掌屋，大个渡細个，下把仔遠遠看著鵲婆个烏影飛來，細叔婆就拿雞祛在地泥項緊敲，雞嬲會咯嘞咯嘞緊喊，細雞子會遽遽走去雞嬲翼下園等，係走忒慢个，就會分鵲婆夾走，這下恹著還會心肝嘖嘖颯喔！

該下仔見擺堵著落雨天，細叔婆會喊偌這兜細妹仔遽遽量米拿去磨，轉來好做水粿仔。過還會緊念：「一升在來米一升水，一半做甜个一半做鹹个，甜个愛擺黃糖，緊煮緊攪，攪勻倒落碗肚，七分淲就好，蒸二十分愛打開來用筷仔試看啊會黏米漿無，係毋會就食得也。鹹个愛炒香料，蘿蔔乾、香菇、蔥頭切幼幼同蝦米共下焅香滴一息仔豆油就好勢也。」聽細叔婆講到口涎波潑³，偌兜幾個人就做到攞手捋腳⁴。

老古人講：「一人有福，牽帶滿屋。」伙房肚有細叔婆，一生人都有講毋忒个生趣事，有笑、有噉，麼个事情都牽牽連連，偌兜實在有福！

¹ 嘍皮帶：音 sai' pi' dai；被皮帶打，被修理、責罰的意思。

² 暖水：音 non' sui'；燒洗澡水。

³ 口涎波潑：音 heu' lan' bo' bad；形容人講話講得很賣力的樣子。

⁴ 攞手捋腳：音 lu' su' lod giog'；捲起衣袖拉起褲管。